



● EDITORIAL ● RAL VENGTU ● CHHUNGKAW CHANCHIN

✦ Synod Hospital Dinhmun
✦ Ramthar Commission zin chhuak
✦ Zirtirtu pual Workshop
Nun Dân Ni tin khawsaknaah

RNI 68092/83 Regn. No. N.E. 1024
From
Synod Literature & Publication Board
Synod Office, Aizawl - 796 001,
Mizoram. Phone - 0389-2324590

SYNOD *Newsletter*

Volume XXVII

No. 358

E-mail : synodnews@gmail.com

JULY, 2013

SYNFO HRUAINA ÊNG ZIN KAWNG

- LPS leh ZONET-ah TV Channel pek chhuah a ni
- Aizawl FM leh Lunglei FM Station aṅgingin Radio programme pawh pek chhuah a ni

– Upa Bonny Lalrindika
Asst. Coordinator i./c SYNFO

Synod Information & Publicity Department, ‘Synfo’ tia a lamtawia sawi tâk hi a tirah chuan Synod Publicity tih a ni a, Synod Office-ah hian Section pakhat ang chauhvîn a awm ṭhin. Dt. 19.3.2002-a Meeting vawi khatna khan zau zawka hma a lak theih nan *Synod Information & Publicity Department* tih ni zawk se tiin rawtna OM-a thlen a rel a (1:1). Hna bul ṭan a lo nih dawn takah chuan Coordinator a awm a ngai a, he meeting hian Upa Zonunmawia, Mission Veng chu sawm ni se tiin a rel a (1:3). Upa Zonunmawia hian April 2, 2002 khan hna hi a zawm a, staff dang atan PRESCOM lam aṅgingin Electronic Media section-a awm mek Pu Reuben Zothanpuia leh Pu C. Lalbiaktluanga te lak phei an ni bawk a, Office hmun atan Synod Office building hluia Archive room sir chu OM-ah dil a ni a, hemi ni hian Office pawh luah ṭan a ni.

TV Ministry

Cable TV-a programme siam ve ṭhin hi meeting vawi hnihna May 10, 2002 khan rel a ni a, LPS neitute be turin mawhphurtute pawh siam a ni (2:5). Ruahmanna siamtute rawtna chu committee-in a pawm a, kar tin Zirtawp zan apiangin darkar khat daih vel programme neih tum ni se tih a ni (4:1(6)).

Kum 2005 aṅgingin Zonet Cable TV-ah Kohhran channel siam ṭan tum a nih thu dawn a ni a, Committee chuan hman ṭangkai ni se tiin a rel a (11:4 of 18.2.2005). Hemi aṅgingin sermon te record-in TV-a tih chhuah turin pek ṭhin a ni ta bawk.

A remchan dan angin chanchin thar leh sermon te TV-a tihchhuah turin siam zel a ni a, a hranpaa channel nei chuang lovin kal zel rih a ni. Independent channel neia kal tuma hmalakna chu chhunzawm zel a ni a, kum 2011 khan tihhlawhtlin dan kawng zir chiang tur inruat leh a ni (27:6 of 10.6.2011).

Committee vawi 28-na chuan AIR FM Zoawi programme lei rawtna a pawm rualin TV channel neih dan tur ruahmanna pawh a thuphungin a pawm bawk a (28:4 of 22.7.2011).

TV leh Radio lama programme kan kalpui tur “**Hruaina Êng**” chu bul ṭan turin pawm fel a lo ni ta a, a hawna programme pawh Committee-in a ruahman a (29:2(b) of 2.9.2011). Ruahman angin “**Hruaina Êng**” TV leh Radio programme chu November 7, 2011 tlai dar 3:00 khan Synod Office building-a JM Lloyd Hall-ah Moderator Rev. C. Lalsangliana’n Pathian hnenah a hlan ta a ni. Hlanna inkhawm hi Rev. Lazuithanga, Executive Secretary i/c SYNFO-in a kaihrui a, khualzahawm atan Pu C. Lalrosanga, Addl. Director General (NER), AIR & DD sawm a ni.

Programme hi a tak taka tihchhuah a la ni chiah lo va, Pathianni tlai dar 3-5-ah Zonet Zawlbuk channel-ah leh LPS channel 1-ah tih chhuah a ni a. Kum 2013-ah hotu inthlak a ni a, Dr. Robert S. Halliday chu Coordinator thar niin January 7, 2013 khan mawhphurhna a la a.

Ani hmalakna hian TV channel hran nei tura hmalakna chu bawhzui leh zel a ni. Tichuan, Zonet Cable TV ah June 20, 2013 aṅgingin *Trial Telecast* neih ṭan a ni a, July, 2013 aṅgingin Zonet-ah GOD channel bulah, LPS-ah channel 5 (Gospel) chhungah Hruaina Eng TV Ministry chu a tak taka kalpui ṭan a ni ta

a. LPS-ah hi chuan darkar li leh a chhuah nawna min pe a, Zonet-ah hi chuan channel puitling pakhat lei a ni thung.

Radio Ministry

SYNFO meeting vawi 3-na June 17, 2002-a neih khan Print Media leh Radio Ministry lama ke pen ṭan turin a rel a, mawhphurtu a siam bawk. Ruahmanna siamtute rawtna chu committee-in a pawm a, AIR-a FM programme a tam thei ang lei ve ni se tia rel a ni (4:1(b:3) of 9.8.2002).

A taka tihhlawhtlin theih a nih hma chuan chanchin thar puan tur pein AIR-ah hian a remchan dan angin a inzep ve zel a. Kum 2011 khan programme lei dan tur zir chiang tur inruat leh a ni a (27:6 of 10.6.2011).

TV Ministry nen hma lak kawp zel niin Radio ministry atan hian AIR FM Zoawi-ah darkar chanve lei ni se, programme hming atan “**Hruaina Êng**” tih ni se, tia ruahmantute rawtna chu Committee chuan a pawm a (28:4 of 22.7.2011)

November 7, 2011-a Synod media programme “**Hruaina Êng**” Pathian hnenah hlan a nih hnu khan AIR FM

Phek 2-na ah zawm a ni...

SYNOD Newsletter

EDITORIAL STAFF

Rev. K. Lalpiangthara (LPT)

Rev. Thangzauva (TZ)

Upa H. Ronghaka (HR)

Upa Khawlchungnunga (KCN)

Editorial

HLAU SUH

Kan Bible-in 'hlau suh' tia vawi za chuang zet min hrilh laiin, hman ațanga vawiin thlengin kan Kristian unaute zingah hlauh nei an la awm reng a. Khawchhak lungpui hlau te, sakawlh hlauh avanga kohhran ațanga hming thai chhiattir te, electoral roll leh ration card-a hming chuantir hlau te leh hlauh dang nei chi hrang hrang kan ramah hian an lo awm tawh thin a. Tunah hian China râl hlau pawl an awm leh tawh an ti a. Heng hlauh nei kan tih hote hi rinnaah te, kohhran leh a zirtirnaah te an chian tawk loh vang a ni duh hle.

Kan Bible-in 'hlau suh' min tih mawlh mawlh lai leh 'thlamuang takin awm rawh u' tia min chah mawlh mawlh laia hlauh lo neih tlat mai te hi setana bumna chu a va ni tehlul em! Kohhranin kan țawngțaipui nasat a pawimawh a ni. Lal Isuan khawvel a rawn thih chilh a, chatuan nunna kan neih phah ang hian, thih ngamin Pathian tan kan nungin a rawng kan bawl ang a, mite an dam tur a ni dawn lawm ni? "Tu pawh a nun humhim duh apiangin a chôn ang a; tupawh keimah avanga a nun chôn apiangin a humhim ang," Lal Isuan a ti zawk a nih kha!

NGENNA

Kristian Tlangau, Kristian Naupang, Synod Newsletter leh Mizoram Presbyterian Kohhran Synod hnuiaia Department hrang hrang enkawl chanchinbua thu chhuah tur rawn ziaktuten a theih hrâm chuan biak theihna tur phone number rawn ziaak lang zel turin kan ngen che u a. Zawnha zawttute pawhin hei hi in rawn zawm theih chuan a lawmawm hle ang.



Rev. K. Lalpiangthara
Editor
SL&PB

phek khatnaa mi zawmna...

Zoawiah November 11, 2011-ah Radio lam chu țan nghal a ni a. Lunglei FM lamah pawh May 5, 2013 ațangin Hruaina Êng Radio Ministry hi kalpui țan leh a ni.

Society Registration

Synod-in Media lama rawngbawlna lama hma zauh hi a ngai pawimawh hle a, tunlai huna rawngbawlna hmanraw chak ber a nih avanga hma thar a lakna TV leh Radio ministry lamah hian ke pen tum a nih hian thil kalphung te ngun zawka zir chian zel a ni a.

Heti lama hmalakna nei tur hian Kohhran ang chuan thil a lo remchang hauh lo tih te hriat chhuah zel a ni a. Chu vang chuan TV leh Radio lama rawngbawlna neih țul tihna chu a taka hlen chhuah a nih theih nan SYNFO Department chu Firms & Society hnuiaia ziah luh ve a lo ngai a.

Committee chuan Firms & Society hnuiaia register chu SEC-ah dil ni se tiin a rel a (35:3 of 7.2.2013). SEC 244:56 of 26-28.2.2013 chuan phalna a pe a, May 1, 2011 ațanga hman țan "The Foreign Contribution (Regulation) Act 2010" leh "The Foreign Contribution (Regulation) Rules 2011"-in a phut angin Synfo Department chu "Hruaina Êng" hmingin *The Mizoram Firms & Societies* hnuiaia registered a ni ta a ni.

Kohhran thahrui kan beisei

Hruaina Êng media ministry kalpui tur hian Synod hian programme chungchangah kohhranhote inpekna a rin chhan hle a. Programme turte hi suma lei vek tur chuan firms tam tak an lo hlawchham tawh a. Synod chuan kohhran thahrui rin chhan tham a nei tih hriain, chungte chu Pathian rin chhan chungin a hman țangkai theih a beisei.

Chuvangin, he Hruaina Êng châm nung tur hian Mizoram Synod hnuiaia kohhranho leh an hnuiaia fellowship hrang hrangte chu tu mah ralbang thei kan awm dawn lo va. Lemchan entir nei țha te, film te, special item te, zaipawl zai leh mal zai te bakah entertainment item tling thei kohhran huang chhunga leng thei chi reng rengte pawh thawh khawm thin turin kan inbeisei a ni. A thawh thei apiang chuan SYNFO Department-ah pe zel turin kan inngen bawk a ni.

NUN DAN

NI TIN KHAWSAKNAAH

'A tuikang nghakin' tih hi Mizo nunphung mawi tak, kan chhawm nun tāk zel a ni a. Tui vân laia tui chawi tur kala, a thal hmasak dan indawta han intlar țhat mai hi a Mizova, a Kristian a, a zahawm bawk. Tuikang nghahnaah chauh ni lovin, heng a hnuiaia tar lanahte pawh hian hman zel ni bawk se a țha.

1. Sa leina hmunah : Khua/Vêng thenkhatah chuan sa lei dawna intlar a ngai fo thin. Mi thenkhat an hawihhawm hle laiin hawihhawm lem lo, chuhhelh tak a awm theih. Chinghnia anga sa inchuhte hi a mawi lo va, a tuikang nghakin aw ni ang ti zêl ila. Sa chauh lo pawh, thil dang leinaah pawh inchuh hi ching lo ila a țha.

2. Ration lâknaah : Ration buhfai, chini leh khawnvartui lâknaah te pawh hian a thang mawi tur ziain chêt thin a țha e.

3. Gas lâknaah : 'Ka thei e' tih vanga huamhap taka Gas laknaa chet te hi a mawi lo va, tih dan awm reng bâka chet hi mi panggai tih atan a țha ngai lo.

4. Ruai thehnaah : Ruai thehna hmuna kan chet danin awlsam takin kan mizia a tilang thin. Riltâm lai tak te hi insum țul hun tak a ni. Dawhtheihna te, insumtheihna te hi hetiang hmunah te hian an pawimawh hle.

Khing kan han sawi tākah te khian kum upa leh tar chak lo te, hrisel lo leh chhangchhia - duhsak âwm tak chu an awm thei. Tin, a zuartu leh thuneituten an lo duhsak te pawh a awm thei. Kan Mizo nun leh Kristianna nena inhmeh tak zela kan awm chuan kan thiltih țhatin kan Van Pa a chawimawi dawn a ni. - TZ

KOHHRAN NUMBER CHUNGCHANG

SEC 245: 57 of 4 - 6 June 2013 in Kohhran Registration Number siam thar leh thu a rel bawhzuiin OM 13:14 of 19 June 2013 chuan Kohhran number la nei lote tan Synod Office-ah in register theih a ni e.



RAL VENGTU

Râl Vengtu chu a râl venbûkah amah chauhva khawhar taka a thut lai chuan, veng lehlam aţanga amah kawm tura paho lo kalte chu ral aţangin a lo hmu a. A hnen an lo thlen chuan Râl Vengtu chuan, “Hotute chu, eng nge in duh ve tak, nangni em em in lo lan ve?” a lo ti chul a. Anniho chuan, “Thing leh maute hian ni sa leh ruahpuite ai hian a chhung lama ngêt awm hi an tuar zawk thin a, hei hi a awmzia min hrilh rawh,” tiin an zawt a.

Râl Vengtu chuan, “Ram leh hnam, kohhran leh pawl reng reng hi pawn lam aţanga beitu lakah chuan an tawh a khirh viau zel a, chhung lama ngêt a awm erawh chuan keh chhiat a hnai a ni thin. Thawh hona thilah reng reng - inkawp fal bik an awm te, mi dang aia thang that lak duh vanga thu lo kalpui filawr ching an awmte hian chhung lamah ngêt a awm duh a. Chuvangin, a huhova thil rel leh engkim kalpui hi a ngêt hrik tihlumna tha ber a ni,” a ti a. Anniho chuan, “I thu min hrilhfiah ang hian fimkhur taka kal kan lo tum ang e,” an ti a, an ţinsan ta a.

RAM PUM HUAP KOHHRAN HMEICHHE SEMINAR

Mizoram Presbyterian Kohhran Hmeichhia, Central Committee buatsaihin August 28, 2013 khian JM Lloyd Hall, Synod Office-ah Fanaute Pathian thua kaihhruai leh Hmeichhiate Venhimna chungchang Seminar an buatsaih dawn a. Mizoram chhung leh pawn Pastor Bial Kohhran Hmeichhe aiawh pakhat theuh tel tura beisei an ni.

CHHUNG TINA SEM TUR LEHKHABU

Mizoram Presbyterian Kohhran Synod Executive Committee (SEC) chuan REV. WILLIAM WILLIAMS (Mizorama Chanchin Tha thlentu hmasa ber) tih lhekhabutê (booklet) a chhuah thar a. Presbyterian Kohhran chhungkaw tina sem tura tih a ni. Kohhran tinin mahni Kohhran chhungkaw zat hriain Synod Office-ah lam theih a ni e.

HRIATTIRNA

Darlak KṚP leh Kohhran Hmeichhiate chuan August 15, 2013 khian Silver Jubilee a huhovin an lawm dawn a. He hunah hian hruaitu hluite chawimawina hlan an tum a. He hun hmang tur hian hruaitu hlui zawng zawngte an sawm a. Sawmna hranpa siam a ni lo vang. Ph-9862235593

SAWMNA

August 15 - 18.2013 chhunga Synod Mission Board hnuai Home Mission North & South leh Cachar Tlangram huam chhunga Missionary-te puala Missionary Retreat kan thlen turah a huam chhunga Missionary zawng zawngte lo tel vek turin kan sawm a che u.

Sd/- Secretary,
Information Sub-Committee.
Chawlhmun Kohhran,
Aizawl, Mizoram

PATHIAN THU ZIR DUH TAN

Presbyterian Bible School, Mission Veng, Aizawlah Session 29-na atan Certificate in Theology (C.Th) Admission hawn a ni a. Dil duhte tan a hnuai tar lan hi hriat tur a ni e.

Admission Form

Office hun chhungin Rs.20/- a lei theih a ni

Dil hun chhung

August 26.2013 (Thawhţanni) tlai dar 3:00 thleng

Dil thei chin

Class VII passed, kum 16 chin, Kohhran dan chhunga awm

Interview

August 29, 2013 (Ningani) Zing dar 10:00

Class ţan hun

September 3, 2013 (Thawhlehni)

Zir hun chhung

September - December, 2013

Stipend

Zirlai pakhat hnenah thla tin Rs. 500 pek a ni ang

Hre chiang duh tan Phone No. 8575308007/23174343/2350082-ah zawh fiah theih a ni.

HOSTEL A AWM LO

Sd/- Rev. R. Lalengmawia
Principal

SYNOD HOSPITAL, DURTLANG MAY, 2013 CHHUNGA THILPEK DAWNTE

I. CHARITY FUND

- | | |
|--|---------------------|
| 1. Pu Lalnunsanga, Durtlang Kawn Veng | Rs. 2,000/- |
| 2. Pu P.C. Khuanghnuna, Khawzawl Zuchhip | Rs. 2,000/- |
| 3. Pi Malsawmi, Lunglei Chanmari (A fapa Vanlalhruaia Chinzah (L) hmingin) | Rs. 2,000/- |
| 4. KṚP, Tlabung Chawnpui Bial | Rs. 2,000/- |
| 5. Khuangleng Bial Koh. Hmeichhia | Rs. 2,000/- |
| 6. Kawrthah Bial Koh. Hmeichhia | Rs. 5,000/- |
| 7. Sairang Dinthar Bial Koh. Hmeichhia | Rs. 13,980/- |
| 8. Electric Veng Bial Koh. Hmeichhia | Rs. 10,000/- |
| 9. Pu F. Lalchama, Mission Vengthlang | Rs. 10,000/- |
| 10. Synod Hospital Taxi Stand Welfare | Rs. 2,000/- |
| 11. Lalpekhlua, Sakawrtuichhun | Rs. 214/- |
| TOTAL | Rs. 51,194/- |

II THISEN PETE

UNIT PEK ZAT

- | | |
|------------------------------------|------------------|
| 1. KṚP, Zarkawt Branch | 41 Units |
| 2. KṚP, Rengtekawn Branch | 42 Units |
| 3. KṚP, Chaltlang Lily Veng Branch | 32 Units |
| 4. KṚP, Rawpuichhip Pastor Bial | 77 Units |
| 5. KṚP, Salem Veng Branch | 61 Units |
| TOTAL | 253 Units |

III THILDANG PETE

- | | |
|--|---------------------------------------|
| 1. KṚP, Tuipuibari Centre Bial | Hmunphiah 60 leh Swabstick thahnemtak |
| 2. Pu Joseph Remmawia, Bawngkawn South | Flower Pot 8 |
| 3. Pu S.P. Zamuana leh Pi Ramengmawii, Kawnpui | Flower pot lian 20 leh a te 21 |
| 4. Programme Officer, NSS, Govt. Hrangbana College | Flower pot 8 |
| 5. Hlutea, Sawleng | Flower pot 8 |
| 6. KṚP, Kawrtethawveng Branch | Hmunphiah leh Swabstick thahnem tak |
| 7. RC Shirt House | Pvt. Ward tan Refrigerator 1 |
| 8. Aibawk Bial Kohhran Hmeichhia | Grace Home tan Rs. 5,000/- |

Khawngaihna leh duhsakna avanga kan Lalpa Isua Krista hminga thilpek min petu zawng zawngte hnenah kan Lalpa Isua Krista hmingin lawmthu kan sawi tak meuh meuh a nie.

Sd/-
REV. C. LALBIAKHLUNA
Chaplain,
Synod Hospital.



Murlen Kohhran chuan Tv. Lalthlengkima Pachuau, Doulos Revival Team ruaiin ni 22-26 May, 2013 thleng khan Crusade an nei a, hemi hnu ni 27-31 May, 2013 thleng Camping nei bawkin campers 38 an lut a, May 25 ah Naupang pualin Lâng Camp an buatsaih bawk. Camping-ah hian Kohhran pawl dang atangin lut an awm nual a. Camp lut ten thlarau pawlna dawngin hlim takin camp an chhuak a, Kohhranho an hlim hlimin hlawkpui an inti hle.

Kepran Kohhran chuan Dt. 1.6.2013 - 1.7.2013 chhung khan Pi PC Vanlalngaki, Jehova Jire Team ruaiin Camping chhawng hnih leh naupang pual Lâng Camp an buatsaih a. Campers 241 lutin Pathian Thlarau Thianghlim siamtharna changin Kohhranin an hlawkpui hle a. Biak In thleng ngai tawh lo te pawh Pathian fakin an lam nasa hle a. Kohhranho ten hlim tak hun hmangin hlawkpui hlein an inhria.

TRIBAL & ADIVASI SUNDAY

National Council of Churches in India (NCCI) chuan August Pathianni hmasa ber hi Tribal & Adivasi Sunday-ah a hmang thin a. NCCI-a tel Kohhran leh pawl hrang hrangte chu tawngtairualna hmang tura NCCI hmunpui lamin a ngen angin Mizoram Presbyterian Kohhran pawhin August 4, 2013 khian Kohhran tinah tawngtai rualna hman tura tih a ni (SEC 245:63). Tawngtai rualna thupui hlâwm riat siam a ni a, Kohhran tinah thawn a ni. Tawngtaina thupui khaikhawmna chu, Aw, Nunna Pathian, dikna te, remna leh muanna kawngahte chuan min kai ang che," (God of Life, Lead us to Justice and Peace) tih a ni.

MIZO HNAHTHLAK, ISUA RING TAWH LOTE CHHIAR MEK A NI

Synod 2012 Gen. 54 thurel bawhzuiin Senior Executive Secretary chuan Kohhran tinin an Kohhran huam chhung/khua/venga Mizo hnahthlak, Isua ring tawh lote chhiara a hma thei anga Bial Secretary-te hnena theh lut turin a ngen a, inchhiarna form pawh a bika siam a awm.

**Anmahni avângin hlau suh la,
Chhan chhuak lôr chein i huênah ka awm e,
Tih hi LALPA thu chhuak a ni.**

ZIRTIRTU PUAL WORKSHOP

July 4 khan Campus Ministry chuan 'Life Skills of a Teacher' tih thupui hmangin Kolasib-ah Workshop an buatsaih a. Hetah hian Kolasib khaw chhunga Government School, Aided School leh Private School (Elementary School atanga College) zirtirtu zawng zawngte an tel thahnem hle. Kolasib Diakkawn Presbyterian Kohhran Hall-ah Primary leh Middle School tan hun hman niin, Kolasib Venglai Presbyterian Kohhran Hall-ah High School, Secondary School leh College tan hun hman a ni bawk.

He hun hmanpui hian Rev. VL Krawschhuanmawia, Campus Ministry Coordinator, Upa Dr. B. Lalrinsanga, Upa VL Zahawma, Laldinmawii leh C. Lalremruata, Outreach Worker te an kal a ni.

RAMTHAR COMMISSION ZIN CHHUAK

June 24 - July, 2013 chhung khan Ramthar Enthatu (Ramthar Commission) member-te chuan Mission Field hrang hrang an tlawh a, Commission member-te hi Group 2-ah inthenin Nepal, Siliguri, Kolkata leh Orissa Field-ah Rev. P.C. Pachhunga, Exe. Secretary; Rev. Lalthangmawia, Synod Statistician leh Upa Lalramthanga te kal a, Delhi, Patna, Lucknow, Jharkhand leh Mumbai-ah Rev. Zosangliana Colney, Rev. Lianhmingthanga Sailo leh Upa C. Thansiam a te an kal bawk.

Ramthar Commission member-te hian Field chhung hmun hrang hrang fang kualin rawngbawlina kalpui zel dan tur leh hma thar lak dan turte an zir chiang a ni.

MISSIONARY PASTOR AWMNA SAWN

Rev. H. Sangkhuma chu a hnathawhna hmun sawn a ni a, a address thar chu a hnuai a mi hi a ni:

**133 Whitworth Square,
Whitchurch, Cardiff CF14 7DP,
Telephone : 02921 151399,
Mobile : 07938550030**

SYNOD HOSPITAL DINHMUN JULY, 2013

+

Synod Hospital chuan tunah hian kum 85-na a hmang mek a, Hospital dinhmun thenkhat hetiang a ni:

Thawktu	Nghet	Nghet lo	Total
Doctor	27	3	30
Nursing Staff	122	62	184
Para Med. Staff	23	5	28
Thawktu dang	89	34	123
A vaiin	261	104	365

Kum 2012 Synod Inkhawmpuiin a lo rel tawh angin Hospital Dinmun Enthatna kalpui tura tih chu April, 2013 atang khan hmalak a ni a. Doctor tha leh inpe an awm theih nan Doctor-te hlawh pawh tihpun niin; chutih laiin he Enthatna-in Doctor-te sum hmuhna dang (Private practice) tih a phal loh avangin Doctor pahnih chuan an hna an chawlhan a. Tin, Hospital kalhmang tluang taka a kal theih nan Director pui turin Upa F. Lalsangliana chu Coordinator-ah dah niin April 15, 2013 atang khan a hna a zawm bawk.

Damdawi inah hian hun rei tak chhung inzai lam thiam (Surgeon) an a w m l o h h n u i n D r C . Lalmangaihzuala, S/o Upa Lunghnema, Mission Vengthlang chuan Pathian tana rawngbawlina tur, a kova inngat leh a mawhphurhna nia ngaiin May 1, 2013 atang khan Surgeon hna chu a zawm ta a, a lawmawm hle.

Hemi bakah hian nikum Hospital Sunday leh kumin July thla inkarah hian Doctor pathum, Staff Nurse pali, Lab. Technician pakhat leh IV Grade pathumin hna an zawm thar bawk.

Tunah hian Private Ward leh Student Nurse Hostel sak mek niin, chak zawka hna thawh a nih theih nan Contractor hnenah pek a ni a. April, 2013 atangin sak chhunzawm leh a ni a, Private Ward bik hi kumin (2013) chhung hian luah theih tura hmalak a ni.

Damdawi in bakah pawn lamah rawngbawlina neih thin niin, Mobile Clinic, Blood Donation leh Surgical Eye Camp te hmang hian damdawi in pan thei lo leh hmun hla zawka mite tan rawngbawlina kalpui thin a ni a. Heng hmang hian mi tam takin Pathian malsawmna an dawng a ni.

Thu lakna : Hospital Report 2013